

東

華

錄

東華錄

康熙五十六

臣王先謙敬編

臣周倫椿恭校

秋七月癸亥以毫濟爲內閣學士由祭酒遷○乙丑以韓奕爲內閣學

士原任董安國爲漕運總督由湖南巡撫遷○先是御史龔翔麟奏參趙良

棟矜功冒奏已蒙 皇上隆恩給以一等精奇尼哈番今越例求

賜田房乞嚴議定罪得旨著趙良棟明白回奏至是趙良棟遵旨

回奏臣願在京居住因請田房實因戀 主心切今臺臣謂臣驕

縱矜功何不矜功於十六載之前而乃矜功於十六載之後耶爲

眾排陷不得不備敘陳奏得旨趙良棟於康熙二十七年來京朕

召至宮中趙良棟歷奏四川功績未敘實爲屈抑言之至於流涕

又明珠過甯夏時趙良棟又言功績未敘今謂十有六載從未矜

功想年老遺忘朕念其首倡建議進取四川俱從寬宥又趙良棟奏入京將及一載借貸銀二千餘兩著賞銀二千兩趙良棟年已衰老著回原籍調養○壬午諭吏部兵部各省督撫提鎮官員閒令來京陛見原欲以地方情形及兵民生計面加諮詢具有深意近見來京各官輒以進川馬等物爲辭多所置辦雖經卻還但恐其在任購買致貽地方官員兵民之累朕本欲詢兵民生計召令前來若反致累兵民殊失朕之初意且川馬如果需用朕自頒特旨令出產地方辦解何須進獻著通行嚴禁○噶爾丹遣使梅塞桑布拉特和卓等上奏曰使臣馬迪被害之故前經屢次覆奏無可另行陳奏之處至於會盟難自定奪奏聞 皇帝若遣丹濟拉丹津俄木布往覲固所願也但正在貧乏難以遣行至澤卜尊丹巴胡土克圖土謝圖汗七旗喀爾喀之事前經奏請乞准行前內

大臣吳丹存日曾與濟隆胡土克圖議定乞如議行行商回子使人向常來往請安是以使往貿易又達賴喇嘛之事漸次興隆使四十九旗蒙古四厄魯特各在其地同享安樂乞照前行奏入命議政大臣議尋議據噶爾丹使人梅寨桑等言噶爾丹今歲未嘗耕種馬匹烙印收集獵戶游牧塔米兒之地意欲掠取根敦戴青順克魯倫下流侵車臣汗科爾沁之西此言雖不足深信亦不可竟以爲虛應檄黑龍江將軍薩布素加意哨探歸化城將軍費揚古處前已有侍郎滿丕前往應令相機行事目下遣尙書班迪探聽聲息俟到後令根敦戴青等入內游牧使其遠設汛哨探信奏報噶爾丹使人梅寨桑應仍遣歸不必降敕將原奏發回奏上得旨著仍撰敕交來使齎回敕曰今春諭爾敕書實爲明顯茲覽爾奏仍以不曉文義巧爲飾說是爾故違朕旨也且爾歷來陳奏皆

云行達賴喇嘛之教今春遣爾使歸後達賴喇嘛及第巴有奏以寬爾罪仍留汗號爲請且云遵諭和之旨特遣賴楞堪卜達爾漢溫卜前赴爾處等語今爾來使梅察桑等言爾游牧於塔米兒之地東向以行爾之所爲必欲異於達賴喇嘛第巴之言者是爲遵其教乎是爲不遵乎以此觀之爾口雖云不悖達賴喇嘛之教而竟不遵行明矣今爾既東向前來應仍會閱庶於事有定不然縱復遣官布告終屬無成其奏請會閱可令丹濟拉丹津俄木布二人齋來儻執故見不遵朕言嗣後永勿上奏通使○予故原任內閣學士田昱霽祭葬○丙戌以阿爾拜爲戶部右侍郎由內閣學士遷○戊子江南江西總督范承勳奏江西有漕糧之四十八州縣除南昌新建二縣外餘皆地處山僻必須小船裝載至省城水次方可交兌糧艘向年俱係民貼腳價官爲解運止因州縣官恐涉私

派之嫌將此載入全書康熙二十六年漕臣奏參以各省並無支給腳價之處無一處報完者此項銀兩若責賠於官官已數更責賠於民又原係民間貼出之價豈可再令賠補且以後若將此腳價停給則僻處州縣之漕不免遲誤更爲可慮懇恩此後仍聽支給以前免其追賠部議不准行得旨江西所屬州縣多處山陬百姓自願貼費將漕米運至水次著聽民貼運從前已經支給者俱免追賠○福建巡撫卞永譽奏原任福建總督范承謨巡海道陳啟泰已蒙贈諡今士民請立祠致祀從之○己丑勇畧將軍趙良棟奏 皇上念臣年老足疾令回籍調養但甯夏無明醫臣欲江南就醫得旨著給與船隻前往○以楊鳳起爲湖南巡撫由布政使遷八月庚寅朔以張勛爲湖南布政使由山東按察使遷○辛卯諭大學士等于成龍向經緣事革職今在河工殫極勤勞其總督原銜可復

還之○以喇錫爲內閣學士

由內閣侍讀學士遷

○壬辰

上巡幸塞外啟

鑾○癸巳

上駐蹕密雲縣諭大學士等去歲朕見此處高粱結

實者少糝者多米價騰貴高粱一斗幾三百錢故將通倉米令運一萬石至此處五千石至順義縣減時價發糶米價稍平一斗百錢民以不因此地寒冷米穀多至失收今河水方盛著將通倉米運至密雲順義各一萬石令貯倉備用○辛丑工部奏請遣大臣閱視河工得旨閱視河工原欲查覈有無浮冒情弊及隄工堅固與否侍郎趙山等往閱河工將總河並未修理之處反稱工程堅固如此則閱視何益今雖再遣大臣不諳水性亦照前人所行而已趙山等著嚴處議罪此後閱河著永行停止尋部議趙山應革職交刑部得旨趙山著爲章京效力○西安將軍博齊奏噶爾丹屬下回子塔什蘭和卓等五百許人過我三岔河汎界肅州總兵

官潘育龍擒解前來請皆拘留肅州邊內俟得噶爾丹確信再行
遣回從之○癸卯河道總督于成龍丁父憂命回旗守制○丙午

上駐蹕克勒和洛命都統公宗室蘇努都統阿席坦護巴等分

統大軍備噶爾丹期以癸丑日師行○以傅繼祖爲內閣學士

由江南淮蘇昌臣爲山東按察使

徐道遷

○己酉先是

上密諭科爾

沁土謝圖親王沙津曰噶爾丹爲人極其狡猾朕欲發大兵往征

恐彼聞風遠遁及至撤兵彼又復來擾爾蒙古今必立圖克獲噶

爾丹遺爾書內既有乞爾遣人於彼之語爾可藉此遣人語噶爾

丹云我科爾沁十旗俱已附爾矣爾可前來我等當從此地接應

以此說之誘至近地於時朕親統大軍風馳電掣彼不及遠遁斷

可滅矣爾可仍遣前所差鄂齊爾再往誘噶爾丹至近地至是沙

津來朝上遣侍郎西拉與沙津同往密授鄂齊爾說噶爾丹之

計視其起行卽以遣鄂齊爾之故密諭達爾漢親王班第及諸台

吉○調董安國爲河道總督以桑額爲漕運總督

由山東巡撫遷

○辛亥

賜喀喇沁多羅杜楞郡王扎什等冠服段匹○遣使齎敕往諭噶

爾丹曰尙書班迪於八月二十二日奏報爾擁兵來西卜退哈灘

巴圖爾及納木扎爾陀音等所居近地肆行掠害前爾自烏闌布

通敗竄時於內大臣吳丹前跪禮威靈佛像誓不再侵中華皇帝

之喀爾喀與衆生靈爾之印文誓書昭昭具在且爾每有奏疏自

謂遵行達賴喇嘛之教乃於朕與達賴喇嘛議結之事屢生齟齬

蔑棄誓言是爾於其教名奉實違爾今來必有意應備奏陳朕自

有裁奪此兵果爾親帥與否差五品官阿爾必特祐前往確詢特

諭○乙卯賜喀爾喀澤卜尊丹巴胡土克圖土謝圖汗多羅郡王

敦多布多爾濟等衣幣○己未以楊廷耀爲山東巡撫

由福建布政使遷

孟世泰爲河南按察使

由湖廣武昌道遷

○予故原任戶部尙書王隲刑

部侍郎李迴內閣學士沈圖祭葬

九月己巳

上駐蹕森濟圖哈達諭議政大臣舅舅佟國維等將

軍伯費揚古報稱噶爾丹將喀爾喀西卜退哈灘巴圖爾及納木扎爾陀音等恣行刼掠卽竄往土喇河順流而下西向庫黑納塔爾納以去以此揆之彼實無意內來京師所發大兵可暫還秣馬以待並檄盛京烏喇黑龍江將軍及科爾沁等諸扎薩克其豫備兵且止仍檄將軍伯費揚古所領兵眾亦權回本汛將馬匹加意喂養若令喀爾喀等入汛界內遊牧恐有互相竊奪之事可檄尙書班迪令在彼汛界外附近處暫居○庚午以汪楫爲福建布政使

由按察使遷

○丁丑改雲南平彝衛爲縣○己卯以李成林爲福建

按察使

由廣西左江道遷

○癸未諭戶部直隸順天保定河間永平四府

水潦傷稼三農歉收雖經勘災頒賑不致化離失所而額辦錢糧若仍行徵取則民力匱乏難以輸將朕心深切不忍著將四府康熙三十五年地丁銀米全與蠲免其霸州雄縣香河寶坻四處皆有水道可以轉輸每處著發米一萬石各差司官一員齎往照彼地時價減值發糶以資民食著行文該撫通行曉諭俾均霑實惠副朕軫念災黎至意○乙酉以線一信爲安徽巡撫由湖北布政使還○己丑先是上諭大學士及部院各衙門堂官等各將屬員賢能者揀選保舉其才力不及年老有疾者亦甄別引見至是大學士九卿等以保舉郎中員外等官四十七員及甄別者四十二員引見上曰此次參革官員甚多伊等皆由部院年久升任原無罪過老病者著解任餘皆以旗缺補用此保舉官員朕未盡識郎中係朕親用之員朕皆知之其員外主事之中有年少堪任用者爾

等可再行揀選尋大學士等又保舉九十五員引見得旨此次參革郎中員缺以揀選員外郎開列員外郎缺以揀選主事開列俱視其出缺之先後歷俸之淺深以次補升其主事員缺著將筆帖式揀選補用再各省有操守清廉愛養百姓練達吏事之官亦著該督撫各舉二員或三員咨送到日奏聞引見○湖廣總督吳璥奏臣遵旨詳察湖南丈量田地自康熙三十年俱聽民間自報州縣官履畝丈勘完糧實無累於民下所司知之

冬十月癸巳諭大學士等右衛地方甚要將軍責任甚重惟伯費揚古堪任是職著授爲右衛將軍仍兼攝歸化城將軍事務○丙午納木扎爾陀音以不遵諭內移致爲噶爾丹所掠又縱噶爾丹致書之人來京面縛請死特旨宥之○丁未添設墨爾根城防守尉四齊齊哈爾城防守尉一○諭議政大臣等聞噶爾丹部落不

過五六千人我大兵皆踊躍願戰而大臣官員逡巡退縮無意效力近噶爾丹於巴顏烏闌屯聚彼縱不敢深入或潛來邊徼掠我外藩亦未可定聞警後始遣大兵勢不能朝發夕至我進彼退我還彼來再三若此凡蒙古諸部亦大遭其蹂躪矣爾諸王大臣可與八旗都統前鋒統領護軍統領副都統等公同籌畫作何進止其詳議之尋議覆宜遣發師徒攜兩月糧赴巴顏烏闌進剿上曰方今冬令噶爾丹雖不能親率其妻孥輜重前來或以遊騎潛掠汎界近地亦未可定然諒其人無多京師大兵不便輕發卽遣往亦未必與彼相值莫若以蒙古兵應之見今墨爾根濟農善巴戴青各備兵一千歸化城有將軍伯費揚古駐紮西路事柄應全付與右翼察哈爾兵歸化城兵及四子部落以西所有扎薩克兵俱令酌量徵調其東路兵宜另派大臣管領兩蘇尼特兩阿霸垓

兩阿霸哈納旗兵著索額圖前往收集鄂克濟哈扎喇克圖見赴
汎界索額圖可偕去喀爾喀土謝圖汗等及兩薈齊忒兩烏朱穆
秦兵著明珠偕阿喇尼恩額森前往收集俱令各駐要地探聽聲
息都統噶爾瑪副都統碩岱朕已令於察哈爾左翼駐紮毋容遺
動設有必不可已機務再行調取會同索額圖明珠等以行其理
藩院官或別部院官聽其酌量奏請帶往茲遣伊等非取其奮勇
一試惟期一應聲息得其真實耳尙書班迪雖見在彼偵探猶恐
京師大兵難遽定行止故復有此遣師之進退俟伊等報聞定奪
○壬子以戴通爲督捕侍郎綬色爲內閣學士由郎中遷○丁巳調張
鋤爲山東布政使王道熙爲湖南布政使

十一月己未朔日有食之○庚申以高拱乾爲浙江按察使由福建臺

廈道

○壬戌安北將軍伯費揚古奏噶爾丹在巴顏烏闌之地宜

分軍進剿 上諭議政大臣等我大軍進剿噶爾丹宜分爲三路
東一路仍派盛京兵二千甯古塔兵一千黑龍江兵將軍薩布素
酌派再派科爾沁兵四千令定期會合沿克魯倫進剿西一路徵
調各處官兵總轄於費揚古由歸化城進剿中一路以京城每佐
領下所餘豫備兵六名及火器營兵與費揚古所請宣化府綠旗
兵停其發往西路皆定爲中路進剿此三路官兵俱令裹八十日
口糧中路隨運米石著諸王大臣官員急公之駝馬馱運儻不足
卽動支正項錢糧雇車裝載西路軍糧應隨運幾日費揚古明白
具奏至師行惟馬最要東光吳橋景州三處戶部見貯有芻豆每
佐領下發馬十匹交地方官飼養遣侍郎陳汝器往督之是師來
年何月何日啟行著費揚古定議以聞○甲子盛京禮部侍郎艾
肅以病乞休命以原品解任○乙丑原任河道總督于成龍條奏

河工事宜 上諭大學士等朕於河務留心日久曾屢經閱視河道並詳察河圖今觀于成龍奏言龍王閘閘底漸虛應於五空橋等處建閘又高家堰運料甚難應開壩行運所言皆當先靳輔亦曾請濬小河運料此仍依靳輔所奏行方善此本可發見任總河如於運道民生實有神益則一面估計興工一面具奏儻有不可行處亦著逐一確議具奏大約清水勢盛足以蕩刷黃河積沙始得通流不至壅遏若淮弱黃強黃水倒灌則河口往往淤滯朕先閱河時親至高家堰徧察情形故悉其要領○丙寅停今年秋決○戊辰子故原任禮部尙書介山祭葬○厄魯特阿穆呼朗等四人自巴顏烏闌來降言噶爾丹向踞和卜多本年二月至八月於克魯倫河源處屯聚掠得納木扎爾陀音牲畜於巴顏烏闌作度冬計兵有六千策妄阿喇布坦見駐厄輪哈必爾哈之地與噶爾

丹仍前不睦絕不通使再噶爾丹竟欲舉兵內入因伊拉古克三胡土克圖以路遠勸止上嘉其來歸授阿穆呼朗等三品官歸

併上三旗給田產衣食○庚午以庸愛爲盛京禮部侍郎

由大理寺卿遷

○命原任武英殿大學士李天馥入閣辦事○乙亥先是上命

副都統阿南達將伊拉古克三胡土克圖僧徒衛徵喇嘛等交將軍伯費揚古查明具奏至是陸續解至京師理藩院同三法司會審伊拉古克三胡土克圖所遣羅卜藏端魯卜等往衛徵喇嘛家探信來爲奸細煽惑蒙古之心衛徵喇嘛等與伊拉古克三胡土克圖交通信息意欲迎噶爾丹之兵是實皆應立斬其衛徵喇嘛徒眾皆應鞭責交與盛京大喇嘛安插得旨此奏暫存之○安北將軍伯費揚古奏巴顏烏闌距歸化城約二千里西路進剿官兵除自齎糧八十日外應復隨運兩月行糧所調各路兵俱令明歲

齊集歸化城二月二十日前後啟行 上諭議政大臣等可俱如
費揚古所請其隨運之米可定爲五十日見今大同附近諸處未
經積貯草豆著戶部派才能官一員往同該撫約計馬二萬匹四
十日芻秣之需速行購備京城每佐領下添撥西路之護軍三名
烏槍兵一名於今歲十二月望後起程至大同養馬四十日如期
赴歸化城進發再宣化府見喂馬匹亦著帶往西路備用其中路
進兵之期俟遣往費揚古處人回定奪○命丁憂河道總督于成
龍以左都御史原銜督運中路軍糧○予故安徽巡撫佟國佐祭
葬○戊寅郎中殷扎納奏臣等往諭喀爾喀公憨都等內移憨都
竟執劫臣等四十餘人北徙行至五站外始釋臣等自行北徙臣
等南歸至憨都親兄台吉車卜登所告之以故車卜登言我不與
我弟同叛今將率兵往追憨都 上曰台吉車卜登不與偕往殊

爲可嘉著將愍都鎮國公與車卜登襲封授爲扎薩克○庚辰

上大閱於南苑○癸未以李鈞爲督捕侍郎

由大理寺卿遷

趙良璧爲浙

江布政使

由四川按察使遷

○丙戌

上還駐暢春園○戊子命安北將

軍伯費揚古爲撫遠大將軍○先是遣五品官阿爾必特祜爾敕往訊噶爾丹至是阿爾必特祜歸以噶爾丹奏章至其奏曰蒙降

敕書不勝懼忭辛未年來草美獸蕃乘便有行想

皇上亦鑒

悉之矣念與蒙古疆界相近恐有妄行故爲之禁止遣人一隊遺書道意而納木扎爾陀音等反以爲往攻棄其牲畜而去至所云掠喀爾喀之事乃我界上行人所劫我不知之至達賴喇嘛所差濟隆胡土克圖與內大臣吳丹等所定之議前經節次上奏伏乞仍照前奏加恩雖有罪愆亦乞寬宥果若有理降溫旨不勝忻悅奏入得旨此奏暫存之勿與敕諭○是月免直隸宣化霜災今明

年額賦

十二月甲午大學士伊桑阿等奏 聖躬灼艾未愈時際嚴寒乞暫停御乾清門聽政應奏事俱交內閣轉奏 上曰朕每日聽政

從無閒斷閒坐宮中反覺懷抱不適爾諸大臣面奏政事朕意甚快體中亦佳今灼艾視前已愈國政緊要朕仍照常御門聽理或遇大風甚寒之日自另有旨○乙未以祖文明爲四川按察使由河

南開歸道遷

○丁酉命都統伊勒慎護軍統領宗室費揚固瓦邇達副

都統碩岱將軍舒恕參贊大將軍費揚古軍事○己亥命西安將軍博壽振武將軍孫思克副都統西爾哈達祖夏璧馬自德巴麟帥師由陝西出鎮彝討噶爾丹○庚子命費揚古以大將軍事暫授參贊甯夏將軍舒恕乘驛赴京師○癸卯盛京兵部侍郎舜拜以病乞休允之○乙巳以山西平陽府地震頒詔天下詔曰邇者

畿輔郡縣災傷疊告而山西平陽府屬復有地震之異雖賴所在倉廩素有積貯及時周賑幸免化離而朕心祇惕不敢以水旱災沴視爲氣數適然謂必政事之失宜方致陰陽之有忒反躬循省深儆予辜夫圖治之道莫先於養民逮下之仁莫重於寬恤茲特誕沛恩膏肆宏赦宥其免平陽所屬今年額賦山西陝西江南浙江江西湖廣廣東福建等省三十三年以前逋賦亦盡蠲之察貪殘卹兵弁赦殊死以下政令有不便於民者督撫察覈以聞○丁未戶部奏烏喇打貂鼠不足額該管官應議罪上曰數年來因常捕故貂少但得如數而已以此議處是無辜獲罪若不得佳者朕但少御一裘何關緊要且貂價甚貴而又非必用之物朕亦不甚需之該部行文烏喇將軍議定到日再奏○己酉以傅繼祖爲盛京兵部侍郎覺羅三寶爲內閣學士

由翰林院侍讀學士遷

○壬子原任

郎中阿必達奏臣聞慙都叛去卽會同喀爾喀王納木扎爾台吉
丹津陶賴等往追時慙都屬下台吉占巴喇綽諾色楞等始爲慙
都偪往隨牧至海魯爾河入據林中不隨遊牧慙都率兵來擊占
巴喇等逆戰奔還自訴貝子益楚克亦率兵來會臣軍共追慙都
戰於呼拉濟地方慙都敗走欲遣人追躡台吉旺扎兒屬下胡進
不付驛馬以致稽誤 上諭理藩院曰占巴喇等力戰歸來殊屬
可嘉著賜與蟒服段布以示獎勵王納木扎爾貝子益楚克等追
逐慙都具見報效忠忱著將陣亡被傷姓名人數查明議敘後有
用兵之處免其徵調胡進交該扎薩克鞭一百嗣後凡有馳驛情
事立行應付勿得遲誤再檄知阿必達當嚴查盜竊橫行仍不時
哨探聲息○丙辰以降調尙書熊一瀟爲太常寺卿○是月免江
西新淦等三縣廣東保昌等四縣所旱災額賦有差○是歲朝鮮

琉球入貢○人丁戶口二千三十七萬六百五十四田地山蕩畦地五百九十七萬五千二百六十八頃五十四畝有奇徵銀二千七百三十九萬一百八十四兩有奇米豆麥六百九十六萬四千七百五十八石有奇草二百八萬一千八百五十六束茶十五萬七千四百五十三引行鹽四百三十一萬九千三百七十引徵課銀二百六十九萬五千二百八十二兩有奇鑄錢二萬三千六百九十四萬六百七十有奇

東華錄

康熙五十七

臣王先謙敬編

臣周潤蕃恭校

康熙三十五年丙子春正月壬戌諭議政大臣等出征馬匹所關甚要著將兵士行李稱驗斤兩毋得過重以疲馬力爾等會議具奏尋議原定兵士每人所給馬四匹四人爲一伍每人廝役各一名一伍合計軍器糗糧以及一應用物共重九百七十五斤零一伍馬十六匹本身與僕從騎坐八匹外餘八匹每馱應載一百二十一斤又每伍增給羸子一匹每馱應以一百七斤合算從之○甲子京師地微震○己巳諭督運都察院左都御史于成龍等中路米車所載過重遠輸沙漠恐馬力難勝可再增造五百輛均分裝載○辛未上御太和門宴賚出征大臣官兵○甲戌漢大學

士九卿科道等奏噶爾丹小醜反覆 皇上赫然震怒命加天討
西路大兵已 特敕撫遠大將軍伯費揚古爲帥而將軍舒恕博
齊孫思克等又率三秦滿漢大兵協剿惟中路將軍未蒙 簡命
竊意 睿謨深遠將欲 親統貔貅埽清朔漠臣等竊以 皇上
爲百神之所憑依四海蒼生之所倚賴似不必以此稽誅小寇躬
臨壁壘伏冀 皇上特簡中路大將軍一人令統大兵與諸路並
剿如慮道里遠隔一切進止機宜調度爲難或駐蹕近邊指授方
畧則諸路大軍自可祇奉 成命立奏膚功得旨朕臨御以來日
以愛養兵民爲念未嘗輕於用兵遠事征討方今宇內無事惟厄
魯特噶爾丹違背約誓恣行狂逞侵掠我臣服之喀爾喀恐漸致
邊民不得休息故特遣各路大兵分道並進務期剿蕩爲塞外生
民除患向年烏闌布通之役朕以策誘噶爾丹入距京師僅七百

里許大兵已經擊敗乃竟中賊計致噶爾丹遁走彼時因朕躬違和未得親至其地失此機會至今猶以爲憾噶爾丹竄伏巴顏烏闡地方相距未甚遼遠是以不憚勤勞親蒞邊外相機行事此賊旣滅則中外甯謐可無他虞假使及今不除日後設防兵民益多擾累所奏已知之○辛巳諭領侍衛內大臣等官軍之廝役人等有能踰鹿角營而進擊者作何給還本主身價令其出戶以示勸勵爾等集議尋議覆官軍家下兵丁廝役或橐駝營或鹿角營或於曠野賊兵對敵之處有能首先躍入眾人接踵繼進以致殺敗賊寇其首先躍入之家下兵丁廝役及其父母妻子俱撥在佐領立爲另戶照例計其人口給還伊主身價得旨依議其第二三前進者亦著照此例行○癸未調線一信爲浙江巡撫以陳汝器爲安徽巡撫

由刑部右侍郎遷

○甲申諭兵部等衙門大兵至巴顏烏闡儻

噶爾丹不敢迎敵從此遁去可豫選察哈爾兵一千六百名喀喇沁翁牛特兵一千四百名再於大兵內及新滿洲諸王護衛喀爾喀兵內共選精兵一萬備足駝馬糗糧務將噶爾丹窮追剿滅○命都統公彭春參贊西路軍務○乙酉 上以親征噶爾丹謁陵啟鑒○諭輓運步兵於常給外各加行糧才堪拔擢者所司彙請錄用

二月丁亥朔 上謁 暫安奉殿 孝陵至 仁孝皇后 孝昭

皇后 孝懿皇后陵奠酒○辛卯 上還京師○甲午命費揚古

自京赴歸化城 上剋期四月下旬令會中路大軍於土喇若噶

爾丹從克魯倫河而下與中路兵近西路兵遠則中路待西路之

兵若噶爾丹在土喇與西路兵近中路兵遠則西路待中路之兵

○以喻成龍爲刑部右侍郎

由大理寺卿遷

○己亥厄魯特策妄阿喇布

坦遣使囊素等請安進貢又奏噶爾丹奸惡乞遣還回子歸己

上賜以敕書曰朕爲萬國元后惟以率土乂安咸享樂利爲心其能體覆載之懷敬慎自持者朕必愛恤教育之其或不循分誼包藏禍心悖安和之理者朕必懲創匡正之此朕統御寰區爲人君之大道也今爾策妄阿喇布坦遣使請安貢獻方物又以噶爾丹奸詐爲所侵陵與爾有不共戴天之讐披瀝情實齎奏入口誠心求恤朕爲一統萬邦之主有不眷爾誠心效順之人乎查爾所奏回子之事今噶爾丹雖無回子前來貿易此後或來朕必交該部查明如爾所請發往爾尙永懷敬順朕將游加恩賜焉前噶爾丹猖獗橫行闌入烏闌布通之時朕遣偏師大敗之欲卽窮追將盡殲矣而噶爾丹乃長跪於達賴喇嘛所遣威靈佛前而誓曰不敢復侵中華皇帝之喀爾喀與眾人民載書加印始免其誅滅而縱

之朕殊不喜征誅今噶爾丹悖棄誓言戕我賚爾之使劫喀爾喀之人阻止班禪胡土克圖之來今又至巴顏烏闌動搖我人民內懷詭詐欲行禍亂其迹顯然朕爲一統萬邦之主何得不加創艾是以發三路大軍誅討凡罪皆在噶爾丹他無與也但三路大軍甚眾聲靈赫濯恐邊外之民不無震驚爾其徧諭爾之屬眾以至吐魯番諸處各令照常安居勿致驚潰特遣內閣侍讀常明理藩院司務英武爲使賜爾花段二十匹銀茶桶茶盆各一具狐腋蟒袍一襲貂帽一頂玲瓏鞵帶一圍皮鞵蟒襪各一對爾如有所欲言其遣人偕使臣來奏○丙午諭領侍衛內大臣等火器營軍士旣派在頭隊二隊其火器營大臣卽率之接戰至於都統護軍統領副都統等俱係特簡大臣人材偉岸並無庸懦者頭隊二隊及兩脇可照各翼派定昔 太宗文皇帝時公彭春之祖和碩圖於

南苑交戰橫衝而入奮勇破賊故封以公爵今有能越眾效力者朕自不靳爵賞若退縮不前者治罪無赦○改江南裏河同知爲江南通省管河道高家堰同知爲山盱同知○甲寅諭大學士等此次各部院衙門本章停其馳奏凡事俱著皇太子聽理若重大緊要著諸大臣會同議定啟奏皇太子○丙辰先是科爾沁土謝圖親王沙津遵奉 皇上前降密諭遣鄂漆爾往約噶爾丹噶爾丹果沿克魯倫河而下掠喀爾喀納木扎爾陀音遂踞巴顏烏蘭上調度各路兵馬旣畢於是日率諸王貝勒貝子公文武大臣

詣 堂子行禮祭旗纛 親領六軍啟行

三月丁卯先是戶部侍郎思格色奉差往口外掘井至是復命上問一井供飲人馬幾何思格色不能對 上諭議政大臣等思格色爲人昏憤居官亦不端著革職充卒伍從軍效力○戊辰諭

領侍衛內大臣等侍衛官員人等前令各領行李而行今未見有隨行者嗣後著各領行李至駐紮處各相助安營朕每日常於野次暫坐若於朕前過者俱勿下馬是日 上出行宮令喀爾喀貝子盆楚克等射射畢 上親率 諸皇子並侍衛等射 上連發五矢俱中兩翼侍立蒙古諸王台吉及貝子盆楚克等皆驚異讚美曰射之神奇有如此耶 皇上英武誠邁世矣於是眾皆跪請視 皇上之弓 上笑以所持弓授親近侍衛吳什傳示眾皆遞相控引竟不能張乃復相顧驚歎曰如此勁弓如何引滿耶○辛未 上駐蹕滾諾爾地方雨雪交作 上以軍士未卽安營雨服露立俟眾軍士結營畢始入行宮營中皆炊飯然後進膳又遣御前侍衛海青以橐駝載帳房及食物柴炭賜輓車未至之人舉轡○庚辰予故巡撫王維珍祭葬諡敏愨

夏四月丙戌朔 上次察罕布喇克○己丑先是遣侍衛克什圖主事保住使噶爾丹所至是坐臺員外郎席保住奏克什圖等攜噶爾丹奏章步行而回 上問議政大臣料噶爾丹待我兵否諸臣奏曰前噶爾丹遣回阿爾必特祜等時一面作往工噶勞圖地方遊牧之狀卻仍駐紮如故今觀其駐於土喇而遣回克什圖等或不待我兵而竟遁未可知也使克什圖等步行而回者是正欲其遲到雖出兵不能追及之意 上曰朕熟計噶爾丹情形久矣噶爾丹之心必以爲今當春令馬匹羸瘦此路旣無水草沙磧瀚海又甚難行大兵勢不能到至朕親來彼萬難料及故奪我使之馬駝令步行而回不過欲堅彼部下蒙古之心示以不懼耳非欲使我兵遲延彼得遠遁也朕先傳諭大將軍費揚古與約師期今費揚古奏本月二十四日可至土喇若依期而至兩路夾攻則噶

爾丹在我掌握安能復脫若我兵先到彼必連夜逃遁費揚古兵縱少遲緩必至土喇地方噶爾丹以疲敝乍到之兵費揚古迎擊可盡行殲滅觀彼在我使者之前舉動噶爾丹早已入我計中矣
○壬辰 上駐蹕塔爾奇喇先是遣官於塔爾奇喇掘井無水

駕至清泉忽涌導成巨流人馬資用不絕眾皆謂 皇上洪福所致無不大悅○甲午諭內大臣等茲已抵邊界自明日始著列環營○乙未扈從大臣佟國維索額圖伊桑阿等奏傳聞噶爾丹之去已遠 皇上當徐還使西路兵前進 上召諸臣諭曰朕以噶爾丹侵擾喀爾喀及外藩蒙古故秣馬厲兵整軍運餉分路進剿曲盡籌畫告祭 天地 宗廟 社稷務期剿滅噶爾丹而還自兵丁以至廝役無不思滅噶爾丹者況爾大臣俱係情願效力告請從軍之人乃不奮勇前往逡巡退後朕必誅之不知爾等視朕

爲何如人我 太祖高皇帝 太宗文皇帝親行仗劍以建丕基
朕不法 祖行事可乎我師旣至此地噶爾丹可擒可滅而肯怯
懦退縮且大將軍伯費揚古兵與朕軍約期夾擊今朕軍失約卽
還則西路之兵不可問矣還至京城何以昭告 天地 宗廟

社稷乎佟國維等叩首謝罪頃之前遣往哨探護軍參領車克楚
至言噶爾丹未遁仍在克魯倫眾始曉悟○禮部議覆福建巡撫
卞永譽奏耿逆叛亂時福甯總兵官吳萬福福州府知府王之儀
邵武府知府張瑞武江西建昌府知府高天爵建甯府同知喻三
畏邵武府同知高舉侯官縣知縣劉嘉猷尤溪縣知縣李埴福州
城守營千總廖有功等守節殉難請建公祠致祭從之○以兵部
送至軍中馬匹羸瘦革兵部左侍郎朱都納職○戊戌諭撫遠大
將軍伯費揚古朕所統軍將至汎界時卽差護軍參領車克楚前

鋒侍衛祁薩木往克魯倫左側躡探聲息今車克楚等還奏云臣等初九日到伊扎爾地方見有寇蹤於是轉回初十日遇沙津王所差鄂漆爾等言噶爾丹於本月初閒自土喇向克魯倫移營第三日我等歸時噶爾丹在達爾漢敖拉山以此揆之噶爾丹已近朕所統大軍矣此寇乃極狡猾之人如敗遁斷不趨土喇必渡克魯倫或從俄儂巴爾濟赴塞梭格或繞巴顏烏闌之後設伏爾等兩隊兵見彼下克魯倫若隨蹤而往未必不入其伏兵之中朕甚慮之特遣藍翎侍衛殷納等諭爾可詳詢地里及彼脫逃之路小心堵禦不可以彼向下流行而輕之特諭○壬寅以齊穡爲盛京工部侍郎由內閣學士遷○丁未撫遠大將軍伯費揚古奏臣於四月初八日至翁金口東進兵駐紮烏闌厄爾幾地方若甯夏兵於初九日至烏闌厄爾幾地方臣等或一路進兵或兩路進兵會同定議

具奏若仍不至據正月二十八日奔來喀爾喀逃人曾有噶爾丹
今在土喇上流之語臣等亦不便久待卽於初十日啟行進趨土
喇矣其甯夏兵到時卽隨後進發鄉導等約畧計云初十日自烏
開厄爾幾起程行二十二宿於次月初三日可至土喇阿喇克山
之西克勒河朔地方 上諭諸王大臣曰前因大將軍伯費揚古
奏言四月二十四日可到土喇二十七日可到巴顏烏闌是以中
路大兵整旅安行已來至近敵之地矣伯費揚古沿途耽誤許久
不見奏聞今忽奏稱改期目前我軍旣偏近噶爾丹應不必待伯
費揚古軍當卽前行爾等議奏尋信郡王鄂扎貝子蘇爾發等議
臣等竊思噶爾丹若果有待我軍之意則亦可俟西路之兵矣若
不能禦我軍威欲行逃竄則其地方寬闊聞信豫遁必相隔遼遠
今量西路兵所到之期緩行以待兩路夾進似爲有益領侍衛內

大臣蘇爾達馬思喀等議臣等前因伯費揚古原奏內有二十四日至土喇之語度等待之期不甚久遠故請俟伯費揚古兵至然後進發今伯費揚古奏五月初三方至土喇阿喇克山之克勒河朔臣等詢問鄉導言自阿喇克山之克勒河朔前行八宿第九日始至巴顏烏闌地方噶爾丹若由巴顏烏闌北逃竄亦有去路如此則等候日期太遠若我軍不進噶爾丹不戰而走一時難於追獲今我軍似應前進酌量而行宗室公吞珠領侍衛內大臣公舅舅佟國維等議中路大軍前進宜近抵克魯倫河前奉諭有欲遣使往噶爾丹之語若伯費揚古之兵可待卽往來遣使延緩日期以待伯費揚古之兵若有可行事宜我軍勢大可卽行剿滅噶爾丹極其狡猾如大軍不近抵克魯倫河而噶爾丹順克魯倫河下流而去則我大軍似難追及矣得旨遣乾清門侍衛馬武往皇長

子允禔營內侍讀學士喇錫往五旗營內商之○遣侍衛額林辰
齎敕諭撫遠大將軍伯費揚古曰爾初七日奏言五月初三日可
到土喇爾原奏言四月二十四日可到土喇二十七日可到巴顏
烏闌是以朕軍因水草無誤定於二十五日閒到克魯倫河今差
前鋒視其行蹤亦已獲其生口矣噶爾丹有沿克魯倫河而下之
勢與我相隔五日程此際爾等理應遣奏數次則朕軍易於迎待
而爾等久不來奏不知已到何地恐稽時日催趲而行遂先於爾
等今或待或行係在爾可情事重大爾等如何行路當速來報因
原議兩路兵孰先到數日有務須等候之約是以朕且待且行如
必不得已則當相機行事耳特諭○辛亥諭議政諸臣俟至拖陵
地方再遣使於噶爾丹度伯費揚古等兵亦將到噶爾丹若遣使
來我亦遣使頻往以待伯費揚古等兵彼若乘此逃竄必生內變

豈能完全耶諸臣奏曰 上諭至拖陵地方再行遣使甚是俟至拖陵時往來遣使以待伯費揚古等兵若噶爾丹接戰則兩路夾擊立行剿滅或逃或降至彼時再議 上是之諭領侍衛內大臣等噶爾丹自以爲無所畏憚煽惑諸蒙古竊踞克魯倫地方謂朕必不親征今我軍緊要軍器俱已備至若噶爾丹聞朕已至必先逃竄爾等欲戰耶欲使噶爾丹逃竄耶可各陳所見諸臣奏曰臣等之意聽彼逃竄似比戰爲愈但所以使噶爾丹逃竄之計臣等不得而知 上曰噶爾丹原係行劫小寇素無遠識信人誑言侵掠喀爾喀以爲我軍不能卽至故敢竄伏克魯倫今大軍已近噶爾丹西路兵亦將至土喇爾等欲使之逃竄朕以爲無難俟其少近遣使往諭云朕欲與親臨約盟爾可前來與我軍會議並不爾剿噶爾丹聞朕親來必連夜奔逃我軍卽行追殺如向土喇退去

必遇費揚古兵朕於此賊廩慮已久此次噶爾丹必然殄滅拒則糜爛竄則逃亡但于成龍所運之米恐不能應期而至耳伊桑阿等可撰敕呈覽俟少近遣往旋卽進兵○壬子奏 皇太后書曰臣違 慈顏日久所以未敢請安者軍中人來往頻數則語言淆雜於事機無益且臣意若仰荷 天佑迅成大功將同捷音並奏也但瞻仰之懷形於夢寐茲特恭請 萬安此聞水泉清而地氣涼臣體中甚佳諸皇子諸王大小諸臣以至軍士俱好臣所統兵無有滯誤咸整肅畢至糧車亦接續而來但以待伯費揚古之兵遂多需時日耳噶爾丹所在距我師甚近彼聞臣親率兵來必爾竄逃今但臣一路進兵則恐其途徑旣多彼將從他處奔突總之此行 天心眷顧似有可憑伏望 聖慈寬舒以待之五月初旬若得事竣約六月初十日可以還京爲此特具奏章自瀚海內察

罕布喇克地方馳聞○商南多爾濟齎大將軍伯費揚古奏至言臣等於初十日自烏闌厄爾幾起程至察罕和朔地方將軍孫思克等亦於十一日至察罕河朔臣等會議將軍孫思克博霽各選精兵二千與臣等一路前進計程本月三十日可至土喇之阿喇克山克勒和朔地方來月初七日可至巴顏烏闌 上命議政大臣等會議尋議應照 皇上前諭至拖陵時頻行遣使以候伯費揚古之兵兩路夾剿得旨大兵或應卽行前進或應候大將軍兵至夾剿仍著前後營諸王大臣公同議奏前營仍著馬武後營仍著喇錫前去○癸丑乾清門一等侍衛馬武回奏前營皇子大臣等議 皇上親統大兵特爲剿滅噶爾丹而出又思遏賊歸路調發西來二路兵俱至正合 皇上神謨今兵力甚盛正宜協力夾擊剿滅噶爾丹其遣使噶爾丹及計大將軍伯費揚古等兵近偪

賊營夾攻剿滅之處俱候 皇上乾斷侍讀學士喇錫回奏後營
皇子王大臣等議與議政大臣同 上諭議政諸臣朕所統大軍
不勞而至人逸馬肥以此精銳人思敵愾寇雖十萬朕將用策親
御以擊之一面遣使往說儻敵人力有餘則聽與我戰力不能及
則聽其走但此寇若走恐在我有追悔之意議政諸臣奏曰噶爾
丹若走則吾事已畢當遣使往說眾意合一 上遂定遣使之議
五月丙辰朔 上駐蹕拖陵布喇克○己未 上以敕書賜物及
所獲厄魯特俄齊爾等四人交公主長史多禪中書阿必達令一
等侍衛喀瓦爾達一等台吉阿喇卜坦以兵衛之送至燕圖庫列
圖 上諭喀瓦爾達阿喇卜坦曰爾等不必到克魯倫度其地形
古爾班圖爾罕巴爾代哈當有敵戍守爾等若往克魯倫則畧迂
繞彼必截爾等之後爾等勿得過燕圖庫列圖卽從彼地遣多禪

等前去未遣伊等之前縱所擒四厄魯特往致聲息可也儻遇厄魯特勿與之戰但令敕書使臣到彼則已敕諭噶爾丹曰朕統御萬邦惟以民命爲重不喜殺伐爾厄魯特喀爾喀向奉職貢爾等交惡構兵以來朕未嘗徇徇而於爾有異視喀爾喀爲爾所敗投朕乞命如朕不救之則皆饑斃矣朕之濟人非特於喀爾喀如此也凡諸國窘迫來歸者朕亦一體救之已明諭爾數次爾奏章來索喀爾喀澤卜尊丹巴胡土克圖土謝圖汗言之不已朕始終不以喀爾喀爲直會諭爾此事非懸議所能結當會盟以講之爾又以生計窘乏不能前來又以誓書所無之言屢向我使臣喇嘛枝梧回奏阿喇尼巡行邊塞猝遇爾兵不待朕旨遂與爾戰因特遣王與皇子與爾會議爾屬下人又先抗拒以致交兵其時所發他路之兵朕卽遣人止之勿與爾戰爾前年至巴顏烏闌遂掠喀爾

喀之納木扎爾陀音朕又特遣使問故約與議盟今朕與爾若不
覲面定議不但爾國難存我邊民亦不得甯居因爾來旣近故秣
馬繕備朕於三月初旬起行西路兵於二月十八日起行黑龍江
兵於四月初六日起行盛京甯古塔兵於三月起行今朕大軍已
出汎界與爾逼近西路兵俱已到土喇東路兵俱已溯克魯倫河
而來朕向崇禮義順天理而行不恃勢力戕滅他人朕果恃勢力
則竟不遣使統各路之兵而剿滅爾無所不可朕乃不忍生靈橫
被鋒鏑是以抒誠遣使朕與爾等覲面定議指示地界爾照舊貢
獻貿易則爾國安生而我邊民亦安乃協朕保列國如赤子之意
豈不休歟朕斷不以計誘人切勿疑畏朕來欲與各處將帥閱兵
已傳令伊等勿戰非虛言也爾如不信可留朕所遣使臣內一人
在爾地儻各處兵進而攻爾爾可差所留人止之一面遣爾前會

奉使爲朕所識之人來奏朕統御萬邦豈肯誘人而破滅之爾或妄動而去則虛朕美意而生靈有不利矣朕茲開誠特賜爾煖帽蟒袍縐段袷純金鉤並巾纓帶一條及幣十端銀二百兩以公主長史多禪中書阿必達爲使爾其籌之自古敵國無害使臣之理況朕與爾向無隙乎五日內遣爾使偕我使來覆特諭○辛酉奉差護送多禪等一等侍衛喀瓦爾達等還奏臣等五月初五日到克魯倫河不見敵人蹤迹初六日黎明有厄魯特丹濟拉率千許人來截取馬羣遂令侍讀學士殷扎納帶厄魯特名俄齊爾者前去殷扎納與言我等係 聖朝使臣不得無禮又厄魯特俄齊爾告以 聖上親來將軍費揚古亦下俄爾洪土喇而來丹濟拉大駭失聲遂領敕書收兵急去○壬戌偵知噶爾丹所在 上躬率前鋒兵在前諸軍鱗次翼張而進兵威之盛彌山徧野不見涯際

整齊嚴密肅然無聲在途次一等侍衛喀第由遣人來奏臣等奉旨前往阿思哈圖山探視遇厄魯特數人潛窺我軍營壘遙見我等倉皇逃遁追至阿思哈圖山之東遇巴克什古爾貝勒等共追逐之 上笑曰何必追逐任其往報亦足以破噶爾丹之膽也

駕至燕圖庫列圖地方將駐蹕地乏水侍衛吳什率鄉導等過一平山忽見泉源涌出水極甘美且充用有餘 上大喜亟往視閱立營掘壕遂駐蹕於西巴爾台○中書阿必達還奏臣等進覓噶爾丹蹤迹遇厄魯特二十餘人謂臣等曰聞 聖上親統大兵而來乞暫緩師噶爾丹在土喇往返須數日 聖上敕書已連夜送往矣請留一使於此俟覆本到以便齎回並發哈什哈二人護送至燕圖庫列圖地方 上復遣扎薩克喇嘛彭素克格隆偕阿必達往諭厄魯特汝等欲我緩兵我師在此地乏水明日到克魯倫

河後當再緩行是日密諭各營安紮營壘如故而營內悉撤去帳房卽御營行帷幔城亦俱不設伏兵空壁以待抵暮上親巡

視營伍○以楊舒爲內閣學士

由太僕寺卿遷

佟國勳爲江西按察使

由浙

江溫處道遷

○癸亥

上以克魯倫河爲噶爾丹必爭之地乃分布隊

伍躬在前鋒前行於途次率數人登高執圓鏡遠望見東有額爾德尼拖洛海山西有山麓一帶從巴爾代哈迤邐接河岸隱見不甚明晰上諭科爾沁土謝圖親王沙津達爾漢親王班第喀爾喀車臣汗納木扎爾王西第西里貝勒盆楚克貝子曰爾等各率爾屬下蒙古十許人往據西方巴爾代哈山麓高處佯作全軍從此經行之狀敵人來犯勿與之戰誘之前來敵若有備則大兵爭先據河○中書阿必達遣撥什庫諾爾布還奏臣等至克魯倫河厄魯特皆已去視馬矢似遁已二日阿必達仍追蹤前去駕抵

克魯倫河諭各隊領軍大臣曰噶爾丹若據克魯倫河我兵奪河
交戰猶稍費力今觀其不於此拒戰而竟逃竄是自開門戶以與
我也除此地外他處斷不能拒我軍審其情形必連夜逃遁矣當
輕騎急追之是日 上駐蹕額爾德尼拖洛海○前鋒統領碩鼐
擒厄魯特至言噶爾丹得釋回四厄魯特問及黃幄布城網城進
止方信 聖駕親來今日親至北方孟納爾山遙望大兵隊伍行
列規模大驚曰是兵從天而降耶遂傳令眾人盡棄其廬帳器械
逃去 上命賜所擒厄魯特衣服使撥什庫諾爾布追送與兩使
臣又遣喀瓦爾達往額爾德尼拖洛海探視有無賊寇○甲子遣
大學士伊桑阿祭克魯倫之神 上親率前鋒兵窮追噶爾丹噶
爾丹倉皇遁走是後數日沿途大獲所遺器械帳房食用等物是
日距克魯倫布隆十八里地方駐蹕○諭領侍衛內大臣等今日

據厄魯特降人言聞朕親率大兵四路並進噶爾丹卽行逃竄朕若率綠旗步兵前進則牽綴遲誤今可揀選綠旗馬兵會合大將軍費揚古向巴顏烏闌追剿噶爾丹其綠旗步兵應留大臣管轄著隨後緩行前來滿洲兵每旗留二十名應派章京護軍校管轄宣化府取來礮二十四門亦著留下漢軍礮十六門能帶則盡帶往若不能帶著留礮一二門所留之兵應派大臣一員統轄克魯倫之克勒河朔地方去此一百三十里朕作二日程前行到彼所留兵丁著作四日程前行到彼擡鹿角兵有不能到者著漢軍大臣等酌量調撥帶往前去○阿必達等還奏臣等循克魯倫而上擒厄魯特庫濟詢知噶爾丹往克勒河朔去 上諭阿必達等爾以所擒庫濟爲鄉導齎敕前往諭噶爾丹言朕欲與爾約會而來爾若不懼親身來議否則於丹濟拉丹津鄂木布杜噶爾阿喇布

坦內遣一二人前來定議爾勿遁走如或遁走則事不能了而爾與屬下俱至困斃朕塞上居人亦不得安矣爾等追三日如不能及卽回可也敕文曰朕以仁御宇內養育羣生惟禮義是尙以祈天眷是以昔會發敕諭盟爾又以生計極艱極窘不能前赴爲辭於是朕一切待備來至克魯倫河欲與爾會盟使之永安度日抒我誠心朕與爾覲面定議爾仍照舊職貢貿易則爾下人得以甯居而朕邊民亦得休息朕斷不愚誑他人爾勿疑懼避去則事無了期而朕種種美意皆虛矣近遣我使偕爾向日充使朕所識認之人前往令五日內遣回特使齎賜爾銀幣以公主長史多禪及中書阿必達爲使不知爾國人受我使否得至爾所否朕使又不獲聞爾之言是以又特遣扎薩克喇嘛彭素克格隆仍以中書阿必達爲使朕今已到克魯倫河爾其反復熟籌之或會盟或另議

作速遣使來告否則爾下人未必盡如爾心爾未必安枕也爾當細思隨遣使來覆朕用是抒撫恤之心賞賚爾馬疲落後之人使之引導遣至爾所特諭○乙丑阿必達使撥什庫諾爾布還報臣等到克勒河朔見厄魯特下營處盡毀其廬帳棄其什物而走
上復遣垂喇克扎木素格隆齎敕往諭噶爾丹敕曰朕惟治道原期有益羣生朕親統大兵欲與爾共議俾羣生享其利益故至此與爾相近處兩次遣使其到否未知爾何竟無一次遣人來也朕爲天下大一統之主不肯罔人而行已經屢頒諭旨爾仍不信逃遁而去兵仗器皿盡皆拋棄爾所屬之人乞降而來者甚多爾生計迫蹙朕所甚悉爾前此無禮於朕使臣朕皆置不問將爾遺棄疾病之人與來歸之人盡皆收養朕若存嗜殺之心豈肯收養爾所屬之人爾仍不信遁去今西路大兵已至巴顏烏闌朕親統大

兵至克魯倫河黑龍江盛京甯古塔等處大兵皆會集於克魯倫河又斷爾歸路之大兵亦已至厄嫩巴爾濟地方爾卽欲遁去安可得乎朕不忍生靈之塗炭故復遣使前來並不欲將爾剿滅出自至誠賜爾段十疋著大喇嘛垂喇克扎木素格隆爲使前去爾試反復思之若仍照舊職貢而來歸順可於丹濟拉丹津鄂木布杜噶爾阿喇布坦三人中速遣一人來爲此特諭○丁卯 上駐蹕拖訥阿林諭議政大臣等噶爾丹逃竄已遠沿途潰散今應選兵裹糧躡迹窮追官軍米糧所關甚重兵丁所帶八十日口糧日期將滿于成龍所運米尙未到若大兵前進則距所運米太遠回時糧餉必至窘匱應使大兵迎糧而還朕備有牛羊斷然不至缺乏西路大兵亦由中路來料理糧務甚要著議政大臣等議奏又諭噶爾丹亡命奔逃量已至巴顏烏闌矣若我全軍追趕似不能

及應選派輕騎追逐除喀瓦爾達所領前鋒二百外其餘前鋒盡行派出滿洲火器營兵及親隨護軍亦盡派出著追至巴顏烏闌過巴顏烏闌以北不必前往諸王等所屬之人若自有二十日口糧不用官糧者亦令同往其同回之兵但留其至拖陵所需五日之糧將餘糧著各旗大臣親驗給與前進兵丁議政大臣等議噶爾丹震懾天威內自潰亂亡命逃竄應選兵追討之處上諭極爲詳至自應祇遵得旨依議○命領侍衛內大臣馬思喀爲平北大將軍領兵追剿噶爾丹○戊辰奏皇太后書曰臣自出京畿軍行在道日惟訓習軍士愛惜戰馬周防哨瞭申明賞罰計程行四十日可抵其處因待伯費揚古期會之兵沿途駐師不能如期而至至於上天仁愛事事默垂眷佑水泉乏絕之地倏爾清流沸涌前克魯倫地旱甚草枯如冬噶爾丹馬畜瘦斃我兵甫至

而雨草遂茂生來降之厄魯特問我軍云此地數日前青草會無一莖今何以忽然而生汝軍中誠有善於求雨者乎又見我軍於河中捕魚彼云汝軍捕之輒爾多獲我等捕之一無所得於此見我等口祿絕矣我軍追逐厄魯特凡五日見其所遺佛經帳房所自殺婦人稚子及疾病之人釜鬻釀具網罟甲冑鞍轡衣服食用木器並在釜之羹在革之酪盡其所有貧窮度日之物率皆委棄其垂首鼠竄之狀殊不堪觀矣比問蒙古及喀爾喀等如此捐棄逃竄爾等視之以爲何如皆云此不但棄其重物雖輕物亦棄之度日之資咸盡矣惟倉皇求生並其所屬之人皆不暇顧又喀爾喀言此卽我等當日情形我等叨蒙 聖主恩養得以有生否則盡委溝壑矣今噶爾丹誰復豢養必窮困盡絕而已其言如此臣觀之果然噶爾丹已經逃遁料其斷不能復來因灼見其情形蹤

迹如此遂酌遣將士窮追往迎伯費揚古之軍此行臣統大兵深入賊望風逃遁全師凱旋者誠大慶幸至蒙古之性情地方之水草兵法之宜守宜戰宜招徠宜遣使宜焚燎及斷其道路防禦堵截難易機宜目所洞悉身所經歷咸已知之自茲以後亦甚易易矣臣於六月初十日內可至京師臣此行乃國家福祉 上天眷佑爲此不勝欣喜愧切具奏以聞 上班師駐蹕克勒河朔是日清晨五色雲見○己巳侍衛額林辰齋撫遠大將軍伯費揚古奏至言臣等欽遵諭旨當卽率大兵星夜前進但行程遙遠馬匹少疲而噶爾丹自布爾察克地方以前十餘站盡焚有草之地因另覓草地趨行仍亟於初三日至土喇以擣噶爾丹之後但祈 御駕稍緩使臣得會師合剿 上於途次閱之喜諭眾大臣曰朕統大兵窮追噶爾丹五日若再前進噶爾丹必成擒矣因不得伯費

揚古兵消息于成龍所運米又不至故遣馬思喀率兵往追今伯費揚古於初三日至土喇則與朕本意相合噶爾丹諒必不能鼠去矣○庚午平北大將軍馬思喀奏臣等十四日至巴顏烏闌南十五里遇往哨之喀瓦爾達攜厄魯特降人奔第來言噶爾丹於特勒爾濟地方遇大將軍費揚古兵交戰噶爾丹敗回復列陣拒敵我軍步戰而前對壘之際見噶爾丹散亂奔竄之狀我遂逃去來降臣等率兵次於額格木爾地方次日倍道前進謹將投降奔第解送得旨著作速檄知京城○予故盛京工部侍郎傅德祭葬○癸酉 上駐蹕中拖陵先是十三日 上諭近御侍衛等適朕心中似有先機西路官兵今日必成功矣至是捷報至果於是日被噶爾丹諸臣皆驚服以爲如神○撫遠大將軍伯費揚古遣副都統阿南達奏捷奏言五月十三日臣軍正向昭莫多前遣驪探

之布達等至特勒爾濟口見厄魯特蹤迹遣人來報臣等卽令署前鋒統領碩代副都統阿南達阿迪等率前鋒挑之因厄魯特勢眾碩代等且射且卻誘至大軍將及昭莫多臣等令將軍孫思克率綠旗官兵居中京城西安滿洲漢軍官兵察哈爾諸扎薩克蒙古就東方山之高處右衛滿洲漢軍官兵大同總兵官康調元綠旗官兵喀爾喀扎薩克就西方沿河布陣謹遵 聖上豫授之策令官兵皆步行噶爾丹率賊萬許向前逆戰官兵奮勇自未至西擊噶爾丹而大敗之分行追逐至特勒爾濟口剿殺三十餘里斬首二千餘級生擒百餘人俘獲子女駝馬牛羊兵器什物無算得旨嘉獎下部從優議敘 上問阿南達交戰情形阿南達奏曰伯費揚古恐涉誇張故奏內皆約畧言之其實交戰處斬賊三千餘級其餘被創逃竄死於山谷中者屍骸枕藉生獲數百人殺噶爾

丹之妻阿奴及賊之渠首甚眾惟噶爾丹引數騎逃出其零星逃散之賊投降大將軍馬思喀者千餘人據降人言噶爾丹遁時部眾多出怨言噶爾丹云我初不欲來克魯倫地方爲達賴喇嘛煽惑而來是達賴喇嘛陷我我又陷爾眾人矣 上問曰西路大兵若如前約於四月二十四日至土喇二十七日至巴顏烏闌則更當何如阿南達奏曰誠若是則賊無一得脫矣 上顧諸大臣曰師行絕域卽奏膚功皆 上天眷佑應先行叩謝乃於行宮南門外設香案親率諸皇子王大臣官員及外藩王行禮大學士伊桑阿張玉書恭捧諸王大臣文武官員慶賀表入奏 上曰朕爲中外生民之主綏輯海宇愛養元元惟以率土乂安爲念厄魯特噶爾丹擾亂邊塞心懷狡謀逆天虐民不容不行剿滅朕親率大軍遠出塞外聲討有罪噶爾丹聞風遁走希圖倖脫適與西路大兵

相遇大將軍伯費揚古等奮勇力戰大敗賊眾擒斬無算盡獲其
人口牲畜從此邊境甯謐不煩遠事征討四海蒼生可共享昇平
之福朕心深切喜悅於是諸皇子在幔城內諸王及文武大小官
員外藩王台吉在幔城外行慶賀禮○奏 皇太后書曰臣君臨
萬邦撫御天下於茲三十餘年數經擾亂俱已削平惟噶爾丹自
烏闐布通遁逃以來悖棄誓言搖動外藩此賊一日不滅則邊陲
一日不甯是以前後周悉思維不憚一身勞苦大漠沙磧多方跋
涉自古迄今軍旅未行之路冒遠徂征出其不意以此強寇肝膽
爲之破裂不戰而逃臣窮追五日見其沿途將所用器物盡皆委
棄已經遠去更欲前追以軍糧漸至短少再四籌度徒勞師眾故
度量敵人蹤迹遣兵進追於所遣兵補給二十日口糧班師而還
業經馳奏以聞荷蒙 上天垂眷俯協人心大將軍伯費揚古之

兵適至戰於特勒爾濟地方剿殺噶爾丹賊眾子女駝馬牛羊盡
皆俘獲厄魯特今已殄滅矣臣不獲定省 慈安奉侍左右者凡
八十日盡剿賊眾奏凱而還於六月初十內可以抵京此皆 上
天默佑凡在師中人等罔不踊躍歡忭臣之福慶駢集所向有成
臣誠不自知也不勝懇切屏營之至謹具奏聞○丙子留牧汎界
蒙古王等行慶賀禮 上諭爾等意中曾料朕此行可直抵克魯
倫立奏大功而還如是之速乎朕尊爲天子富有四海此番出征
朕日食一餐夙興夜寐櫛風沐雨每至一處朕皆步行及聞噶爾
丹確信朕親率前鋒窮追凡此特欲速滅兇寇使爾等咸得安生
故耳今噶爾丹已滅不但爾等永無侵擾之虞得享昇平之樂朕
亦不復爲爾憂勞矣諸蒙古王等跪奏云 皇上念我外藩蒙古
不辭勞苦七旬之內立奏膚功誠世所罕有功德誰不傾心歸服

上曰爾等於引路探信牧馬掘井諸事甚爲效力誠屬可嘉朕必重加賞賚朕昔以汎界之內視爲一家今土喇克魯倫以內皆爲一家矣○庚辰 上駐蹕塔爾奇喇賜留牧蒙古諸王貝勒貝子台吉等宴及白金喀爾喀妻子老幼齊集行宮東門叩謝再造之恩 上諭朕君臨天下統御萬邦本無分於內外卽絕域荒陬皆吾赤子一體眷念厄魯特噶爾丹逆天肆虐恃強陵弱擄掠喀爾喀等國朕不辭勞瘁親統大兵征伐剿滅今厄魯特之禍靖則朔方永清矣爾七旗喀爾喀自今以後各自樂業圖報國恩以副朕家視天下至意隨命原封貝子伊爾登濟農達禮等以次入幔城進見眾皆叩頭歡呼萬歲復賜茶及宴賞銀幣衣服有差自是以後至獨石口皆依此例每日王貝勒貝子台吉等來行宮外慶賀朝謁貢獻駝馬牛羊不可數計 駕行時男婦老幼拜跪路旁

迎獻酒漿沿途環擁歡聲徧野

六月乙酉朔命理藩院檄青海薩楚墨爾根台吉等諭以噶爾丹敗逃及達賴喇嘛已死九年第巴匿之假其言誑誘噶爾丹作亂之故令探聽噶爾丹聲息儻彼西走卽行擒解至噶爾丹女嫁於博碩克圖濟農之子並噶爾丹之人在青海者悉令執送○癸巳上還京師○甲午羣臣行慶賀禮○諭領侍衛內大臣等喀爾喀郡王善巴曾奏噶爾丹不可使久據克魯倫地方應速征剿此次用師善巴盡所有馬匹供我軍騎乘甚著勞績殊可嘉獎貝子益楚克聞愍都逃遁卽遣人追捕此次用兵凡擒活口偵賊信亦懋著勤勞應將伊等敘功以示激勸議政諸臣會議具奏尋議覆郡王善巴應授爲親王貝子益楚克應授爲郡王從之○乙未諭大學士等此番出征地方形勢守亦可戰亦可但得天時甚難兵

早出則天寒無草乏水兵不能行遲出則天暑雨水多儻連日霪雨則樵採不敷必致窘乏此番兵出遇無水之地而得水無草之地而草生寒暑俱調此特上天眷佑故滅寇而成大功並非人力之所能也其以是傳諭九卿○諭朕茲出師見察哈爾之軍人皆壯健效力爲最其護軍每月應加餉一兩至四十九旗士卒連年出征巡哨往返勞苦每兵一名歲以六兩爲率給與三年○副都統阿南達奏問降人言噶爾丹逃向何方知之不明丹濟拉丹津鄂木布會丹津阿拉布坦於博羅之地不久卽別率其屬下百餘人往覓噶爾丹丹津阿拉布坦率其屬下五百餘人順博羅河下流而去我等俱自彼地來聞滾占之妻率其屬下人從憨山南渡土喇河溯塞梭河道走其內自亂伊德順阿爾寨桑等叛而內來滾占之妻率兵與戰伊德順柯爾寨桑敗又噶爾丹所設尾後

兵明吾特布喇特兩處干許人正當噶爾丹敗亂之時見丹津阿
拉布坦屬下人婦子從特勒爾濟口向博羅河而走此干許人追
及之奪其畜產婦子中之佳者往投喀爾喀和托輝特之根敦戴
青而去 上以示議政諸大臣○己亥轉阿爾拜爲戶部左侍郎
以陶岱爲戶部右侍郎由內閣學士遷○左都御史蔣宏道以目疾乞解
任允之○停本年秋審○癸卯轉馬爾漢爲兵部左侍郎以嵩祝
爲兵部右侍郎朱都納爲內閣學士原任兵部左侍郎○以吏部左侍郎
常書爲翰林院掌院學士刑部右侍郎尹泰爲詹事俱仍帶侍郎
品級○壬子轉安布祿爲吏部左侍郎調阿爾拜爲吏部左侍郎
管右侍郎事轉陶岱爲戶部左侍郎調庸愛爲戶部右侍郎以阿
山爲盛京禮部侍郎由左副都御史遷○以吳璵爲左都御史由湖廣總督遷○
癸丑達賴喇嘛使人戈尼爾羅卜臧帕克巴格隆等奉諭自西甯

至京 上命領侍衛內大臣索額圖大學士伊桑阿傳諭曰噶爾丹敗於烏闌布通遁走之時首頂威靈佛像設誓云不但聖上屬下人民卽喀爾喀降人以外再不敢復犯矣去年又背誓至克魯倫地方殘害喀爾喀掠我降人納木扎爾陀音於是朕親統大軍往討噶爾丹懼而奔遁適遇我防禦之兵誅殺過當噶爾丹率數人逃竄餘者盡降厄魯特遂滅厄魯特降人告曰達賴喇嘛久已脫緇矣天下蒙古皆遵奉達賴喇嘛如達賴喇嘛身故理宜報聞諸護法主以班禪主喇嘛之教繼宗喀巴之道法乃匿達賴喇嘛之喪指達賴喇嘛之名唆誘噶爾丹朕屢遣使問之第巴皆不使與達賴喇嘛相見僞居高樓之上以示之第巴原係達賴喇嘛下管事人朕優擢之封爲土伯特國王乃陽奉宗喀巴之道法陰與噶爾丹比欺達賴喇嘛班禪而壞宗喀巴之法前遣濟隆胡土克

圖至噶爾丹所爲噶爾丹誦經選擇戰日朕爲眾生往召班禪沮而不遣朕無責達賴喇嘛達賴汗青海諸台吉之意朕今遣使於達賴喇嘛果達賴喇嘛尙在則面見朕使臣曉諭噶爾丹遵朕旨行朕凡事俱畧無介意若仍誑我使人不令相見斷不輕止至噶爾丹之誓濟隆胡土克圖等見在其地問之豈有謬乎今將遣使往彼其來人或欲全歸或欲數人先歸爾等可詢明隨其意遣之

東華錄

康熙五十八

臣王先謙敬編

臣周潤蕃恭校

秋七月乙卯朔以綏色爲刑部右侍郎

由內閣學士遷

○丁巳以哈山爲

內閣學士

由內閣侍讀學士遷

○戊午命修平定朔漠方畧○侍郎西拉奏

臣遵旨問降人丹巴哈什哈噶爾丹當往何處丹巴哈什哈等曰我等以爲噶爾丹必往投達賴喇嘛所以不他往者昔鄂齊爾圖車臣汗之子噶爾旦木巴之女阿海原與策妄阿喇布坦議婚噶爾丹自取之又殺策妄阿喇布坦之弟索諾木喇布坦策妄阿喇布坦因率兵五千而逃後噶爾丹往烏闌布通策妄阿喇布坦盡收噶爾丹之妻子人民而去是策妄阿喇布坦所不可往也若圖爾胡特之阿玉奇所有仇人鄂齊爾圖車臣汗之弟在道旣遙遠

而阿玉奇之女又嫁策妄阿喇布坦是阿玉奇所亦不可往也噶爾丹與鄂羅斯差人貿易而已原不相好往鄂羅斯之路有洪郭壘及罕二道罕之路有明安特忒棱古特諸人在俱係仇人是鄂羅斯亦不可往也噶爾丹向達賴喇嘛之去路哈密雖係仇人有噶爾丹屬下回子在青海左側有番子二千家在青海諸台吉亦不沮之如得到達賴喇嘛地方則噶爾丹與第巴甚好且噶爾丹於爲喇嘛時居班禪胡土克圖所謂唐古特國之托卜察一城人乃噶爾丹前生尹咱胡土克圖時之徒也故使爲屬下有征賦之人在沿途可得馬匹糗糧而無沮之之人丹濟拉丹津鄂木布如與噶爾丹同在一處斷不相離必偕往投達賴喇嘛處 皇上今遣人率兵追討噶爾丹但收離散者問之自得噶爾丹去向實音報聞○以李輝祖爲湖廣總督

由河南巡撫遷

○以席密圖爲督捕侍郎

貝和諾爲左副都御史

由大理寺卿遷

○庚申以龍門赤城蔚州供應軍

需詔免來年額賦○癸亥廣天下鄉試解額○以哈雅爾圖爲內

閣學士

由大理寺少卿遷

李國亮爲河南巡撫

由布政使遷

○戊辰以努赫爲

左副都御史

由少詹事遷

○己巳以平定朔漠功成勒石太學○甲戌

以佟世雍爲河南布政使

由雲南按察使遷

○彭素克格隆齋敕往諭噶

爾丹回奏臣與中書阿必達於五月初九日往尋噶爾丹蹤迹十

二日至滾噶罕臺見無厄魯特形影臣令阿必達攜疲馬先回以

此情事奏聞

皇上臣獨追噶爾丹至特勒爾濟地方遇厄魯特

千許人擒臣至俄爾坤河臣夜間乘隙逃出向內而行於六月初

七日到特勒爾濟河遇喀爾喀阿里雅扎薩克阿爾薩蘭衛寨桑

彼言我等奉大將軍令至熬山昭莫多地方收集逃潰之賊擒得

厄魯特男婦一百六十餘口今於其中擇三十人解送京師爾可

率之同行二十九日到克勒河朔見侍讀學士喇錫言 皇上命我等率七台吉兵往追噶爾丹並探爾信息臣以行事告之喇錫使人送臣及厄魯特被俘三十人入汎界見大將軍伯費揚古大將軍言如許人同行則程途耽誤當擇數人帶去遂使厄魯特卓禮克圖達爾漢巴什克津巴卓禮克圖等六人與臣偕來 上命卓禮克圖津巴等歸諭噶爾丹遣理藩院官一員帶至汎界在附近旗分酌湊坐馬口糧撥鄉導指路前往 上諭議政大臣等大將軍伯費揚古應令自科圖移駐善巴王汎界因出侍讀學士喇錫大將軍伯費揚古疏命議政大臣集議尋議侍讀學士喇錫奏厄魯特額圖格來降云噶爾丹戰敗奔竄到他米爾之台庫勒地方遣人收集丹津阿拉布坦丹濟拉丹津鄂木布等伊拉古克三胡土克圖亦往與之合大畧兵有五千餘牛羊甚少無廬帳者多

議欲往翁金一路或瀚海四圍有居人掠得牲畜如根敦戴青逸去暫且偷生或往哈密如哈密仍前和好則資其糗糧以度今冬如哈密與之反顏卽攻而取之以爲根基議既定六月二十八日自他米爾向翁金起程閱三日我等逃出又六月二十日達賴喇嘛使人鄂木布來亦隨噶爾丹而行又因住他米爾地方二十餘日馬已漸肥聞根敦戴青在塞稜格云又大將軍伯費揚古等奏黑龍江將軍薩布素於七月十六日已率兵到科圖臣等遵旨正擬領兵回京得侍讀學士喇錫之報如噶爾丹欲往翁金一路已自他米爾起行是以臣等率官兵往科圖候旨今應令大將軍伯費揚古親身沿邊而往酌調善巴王及附近旗分兵駐紮邊汛噶爾丹前來卽迎勦之其與大將軍同處之兵將軍孫思克博霽俱令來京餘總兵等官俱令率兵回汛 上曰此乃大將軍伯費揚

古未完之事著率薩布素兵五百酌取蒙古兵往善巴王邊汛諸地方偵探聲息噶爾丹或在翁金或有過去之信相機迎剿著將軍薩布素率所餘兵五百駐紮科圖如有厄魯特來降令其收納○予故兵部侍郎戴通祭葬○己卯以倭倫爲內閣學士

由內閣侍讀學

遷士

八月甲申朔 上命員外二郎保齎敕往諭青海諸台吉至是二郎保奏臣至青海之察罕托羅海地方以部發印文示達賴喇嘛所遣管理青海事善巴陵堪布又告以擊敗噶爾丹之事堪布言此事大我不得獨主其議俟青海諸台吉同來會盟定議再覆七月初八日扎什巴圖爾等三十一台吉俱到盟所以檄文授之扎什巴圖爾言噶爾丹殺我鄂齊爾圖汗取我屬裔與我亦有讎但噶爾丹之女嫁博碩克圖濟農之子乃告之於達賴喇嘛而結姻

者我等俱達賴喇嘛之徒俟啟聞達賴喇嘛視其言何如遵依而行非可任我等之意覆奏 上命議政大臣等會議尋議應令扎什巴圖爾等將達賴喇嘛作何定奪之處備文覆部並將此等情由增入達賴喇嘛敕諭內從之○乙酉以崔俊爲雲南按察使

東肇高廉
羅道遷

○癸巳諭吏部山東巡撫楊廷耀居官甚劣著革職○

議政大臣等議奏郎中滿都密報降人回回國王阿卜都里什特言昔年爲噶爾丹所誘被執十四年今噶爾丹敗始得脫身來歸近聞噶爾丹在古爾班塔米爾臺庫魯地方度其窮困不能久居必往青海往青海有哈密吐魯番葉爾欽三路而哈密與嘉峪關相近有 天朝大兵葉爾欽有我回回兵二萬許在彼皆未必敢往恐當往吐魯番我願留子於此親往吐魯番以 聖上威德宣諭屬下眾回子又策妄阿喇布坦所居博羅塔喇與吐魯番相近

往與合謀擒噶爾丹以報受辱之讎應令理藩院遣官往召阿卜都里什特至京加之恩賜再遣官送出嘉峪關得旨著遣官召阿卜都里什特及其子額爾克蘇爾唐赴京可傳諭云來京之後俱一同遣歸○甲午復遣官齎敕諭達賴喇嘛達賴汗班禪第巴及策妄阿喇布坦○丁酉吏部奏兵部尙書索諾和辦理兵丁需用馬匹疲瘦應革職 上諭大學士等朕以索諾和才優洊擢尙書自任尙書後並不勤勉效力此番軍務彼全然不知凡事惟圖塞責不實心料理如此則任彼尙書亦有何益况彼身任中樞於邊疆官兵情弊不加詳察一任怠玩以致兵部事務極其隳壞著照所議革職○癸卯侍讀學士喇錫奏臣等在憨山據厄魯特降人祁齊克墨爾根薩圖等言噶爾丹到塔米爾後集眾共議將見無兵之地掠瀚海四圍居人取其糗糧以往哈密丹津鄂木布言哈

密皆村落我不慣居其地於七月初四日叛而西去噶爾丹率兵

追之阿喇布坦亦自覓生路去矣若丹濟拉斷不背噶爾丹也我

等明知大軍早還向汎界大路而來固近然不識其路土喇克魯

倫乃我等所知之地故從此路而來據此恐後降者或從土喇而

來地方相去甚遠無人收集且噶爾丹丹津鄂木布交惡相攻其

潰散之人亦未必不至土喇慙山地方捕獸取魚以度生命是以

臣等率車陵扎卜兵二百名阿里雅扎薩克兵五十名暫留慙山

四圍守候聲息遣人躡探報聞○甲辰以開音布爲兵部尙書

軍統領遷○丁未以李煒爲山東巡撫由安徽布政使遷○辛亥諭大學士阿

蘭泰近日部中各官凡事不行速結惟務偷閒入署未久卽散歸

家偃息如此則政事有不壅積者乎朕聽政三十年夙興夜寐有

奏卽答或有緊要事輒秉燭裁決此爾等所共知也各官果能勤

敏諸事何至遲誤可傳諭各該衙門將應結之事速行察奏○是月免福建閩縣等五縣旱災額賦有差

九月甲寅朔回回國王阿卜都里什特奏仗 聖上天威滅噶爾丹臣得出降今又使送臣歸國臣到吐魯番探信或誅噶爾丹或擒解噶爾丹俟得實音歸臣舊居葉爾欽地方再來進貢請安但往葉爾欽必過策妄阿喇布坦地方恐厄魯特之心無常伏乞皇上敕旨開明臣已歸降勿得虐害 上命大學士與議政大臣集議尋議覆應敕該部檄知策妄阿喇布坦阿卜都里什特等已歸降本朝今送歸故土勿致虐害嗣後厄魯特與回子當永相和好從之○以淮黃秋漲發粟賑邳州等州縣衛○乙卯先是理藩院奏陸續來降之厄魯特大小人口共一千五百餘人向暫在張家口安插應令伊等赴京 上諭領侍衛內大臣等著取丹巴哈

什哈等來京令副都統吳達禪乘驛而往同納拉善滿都遷來備
厄魯特有不願來內地者卽送赴大將軍伯費揚古軍前著各給
馬一匹遣回令彼往諭噶爾丹言彼若來降亦待以顯榮其看守
厄魯特等之察哈爾兵各歸本地至解厄魯特降人到京著邊關
官兵綠旗官兵轉遞押解並令戶部理藩院賢能官各一員前往
沿途給口糧食物旣取伊等到京應令議政諸臣會議編入旗分
佐領至是議厄魯特降人應編入鑲黃正黃正白三旗滿洲佐領
其內有父子兄弟不可離者如編入一佐領爲數浮多則扣算一
佐領人口其編餘入本參領內之佐領內有年老孤身附入人口
少者之家給米贍養從之○丙辰 上憐阿卜都里什特等拘久
困阨特賜銀幣遣候補主事回子楊國琳馳驛送還伊本處命領
侍衛內大臣索額圖尙書馬齊一等待衛馬武送至盧溝橋○哈

密回子頭目額貝杜拉達爾漢白克遣人進貢來降○丁巳以張

四教爲安徽布政使

由廣西按察使遷

○辛酉先是以淮黃交漲遣戶部

員外郎綽奇閱黃河水勢至是回奏中河北岸之隄未遭水患其

水已減六尺

上諭大學士伊桑阿等向朕逆料中河北岸之隄

最爲緊要定須堅固因命靳輔于成龍加意修治是以雖遇大水

得無妨害若此隄一決不可言矣歷年之水無有大於今歲者此

番無害則似可永固黃河之水從雲梯關入海雲梯關沙漲壅塞

水每爲其所阻以致退流河隄不能捍禦因而衝決今將淤泥挑

濬河道加深所以水得通洩其利普矣○癸亥理藩院議覆四川

巡撫于養志奏臣遵旨會同烏思藏喇嘛營官等查勘打箭鑪地

界自明季至今原係內土司所轄之地宜入版圖但番人藉營生

居處年久且達賴喇嘛曾經啟奏

皇恩准行應仍使貿易番人

之事應行文達賴喇嘛使曉諭營官遵行管理關繫土司之事著
土司管理勿致生事至打箭鑪四交界之地該撫詳查報部編入
一統志從之○乙丑侍讀學士喇錫奏據厄魯特降人吳默赫墨
爾根寨桑等言我向爲丹津鄂木布護衛丹津鄂木布爲噶爾丹
所迫料力不能敵遂分散其眾往投策妄阿喇布坦策妄阿喇布
坦往空奎扎巴喀居住不預噶爾丹之事目下噶爾丹人止千餘
馬駝亦甚少今天時漸寒大半無居無食噶爾丹必不能保有其
下人殆必散盡矣報聞○丙寅先是 上命撫遠大將軍伯費揚
古帶黑龍江兵五百名駐紮善巴王汛界偵探眾皆不喻其故至
是丹濟拉果以大兵奏凱回京喀爾喀善巴王等必出塞游牧可
乘隙取糧率兵一千五百南來旣到阿濟爾布都納地方適遇所
遣卓禮克圖達爾漢巴克什津巴等告以大兵堵禦邊汛丹濟拉

聞之大驚遣察哈代以書請降伯費揚古據書奏報而丹濟拉已遁去矣眾乃服 睿算之神○議敘厄魯特降人丹巴哈什哈察

罕西達爾哈什哈俱授二品官爲散秩大臣梅寨桑熬都俱授三品官俄欽爲一等侍衛餘授職有差○戊辰刑部尙書圖訥等奏噶爾丹納貢之西賴古爾黃番黑番人等及噶爾丹所遣督催番人貢物之厄魯特達爾漢寨桑卜爾奇等共七千四百餘名俱傾心投順但督催貢物者係噶爾丹所屬之人不便令居原地已委官解京其西賴古爾黃番黑番人口眾多難以遷移應將邊外住居者俱令遷移邊內下所司知之○己巳以魯超爲廣西按察使

由廣東惠潮道遷

○庚午厄魯特格壘沽英寨桑等遣察罕哈什哈來請

降 上諭大學士等格壘沽英乃噶爾丹信任大臣遣使請降言噶爾丹困窮已極糗糧廬帳俱無四向已無去路目下掘草根爲

食八月初四日大雪深數尺向謂蒙古之地不論經由何方皆可以行難以尋覓由今觀之皆有一定行路一定住處欲覓噶爾丹亦無所難草木非人所食惟厄魯特乃能延至此時然亦安能久也○壬申 上啟鑾巡幸北塞經理軍務○乙亥以哈雅爾圖爲兵部右侍郎羅察爲內閣學士由內閣侍讀學士遷○丁丑撫遠大將軍伯費揚古奏副都統祖良璧等敗厄魯特丹濟拉於翁金 上諭議政大臣等噶爾丹爲我軍所敗但存馬匹衣服奔逃而去食盡衣單漸及寒凍勢在必亡前據侍讀學士喇錫報稱噶爾丹由翁金之路而去朕卽料其必將劫米故豫遣人諭祖良璧將米燒毀丹濟拉不知米已燒毀果至翁金今爲祖良璧擊敗朕甚喜悅噶爾丹似此困極雖不進討亦必滅亡今但以招撫爲要故朕諭大將軍頻遣噶爾丹降人往招之噶爾丹今雖不降其部落旣散之後

自來歸順矣○庚辰喀爾喀貝勒根敦戴青遣使進貢請安並奏
言聞、皇上親統大軍滅噶爾丹已自率兵從塞稜格向內而來
願擒噶爾丹自效 上諭議政大臣等根敦戴青久無音耗朕甚
念之今遣使來奏勦撫噶爾丹之餘黨則噶爾丹之滅速矣朕心
大慰卿等亦必喜悅也可著諭來使如擒獲噶爾丹不必獻俘卽
在本處立決尋命給根敦戴青俸並賜冠裘等物○辛巳奏祝
皇太后聖壽書曰臣自離紫閣數隔晨昏瞻企彤闈日依左右頃
當小春應律 聖誕欣逢臣自歷關山未獲捧觴介壽神馳禁籞
唯思作頌呼嵩謹遙拜行禮所有年例進祝儀品呈上仰希俯鑒
茲偶得野物附使申獻一味旨甘用達微誠於鷹塞 千秋有慶
正昭景福於鑾階伏願 聖母壽厯靡涯與歲華而並永嘉禧茂
集比山岳以增崇臣不勝懼忭翹切之至○京師地微震○是月

免江南山陽縣大河衛水災額賦十之三

冬十月甲申朔 上駐蹕鄂羅音布拉克以衣裘牛羊齎赴大將軍伯費揚古軍前賚從征軍士○命喀爾喀郡王色冷阿海台吉阿里雅等及厄魯特降人射畢 上率諸皇子射連中十矢諸皇子皆屢中喀爾喀及蒙古諸王台吉與厄魯特降人無不驚服 上問色冷阿海等喀爾喀厄魯特構兵之由顧諸王大臣曰今日喀爾喀厄魯特皆在朕直論其事彼皆向來貢獻本朝之國兩國交惡其曲不在厄魯特而在喀爾喀喀爾喀先犯厄魯特喀爾喀理曲是以其國爲厄魯特所破但厄魯特假伐喀爾喀爲名進我境內烏闌布通之地爲我師所敗已誓不復侵喀爾喀矣今又背誓入犯我邊汎屯於克魯倫之地則厄魯特理曲是以朕親統六師滅之天道昭然毫髮不爽朕爲天下萬國之主甯有偏徇之

理乎喀爾喀王及厄魯特降人皆跪奏曰 皇上申明大義方知兩國致敗之由實我等所自取也賜扈從大臣蘇爾達阿蘭泰馬齊蘇丹等馬駒各一匹○丁亥 上駐蹕昭哈賜沿途蒙古貧戶及進牛羊人等金○庚寅先是撫遠大將軍伯費揚古大破噶爾丹於昭莫多生擒男婦三千許各給擒獲之主至是 上皆賜銀贖出使其父子夫婦兄弟完聚○丁酉給右衛陣亡官兵白金大同綠旗官兵亦如之○子故內閣學士毫濟祭葬○壬寅副都統阿南達奏奉諭令臣各路備兵臣自布隆吉爾地方使噶爾璽多爾濟來使齎文諭哈密回子達爾漢白克曰聞逃來人言丹津鄂木布叛噶爾丹而出丹津阿喇布坦亦往投策妄阿喇布坦噶爾丹自身不及千人在額河無口糧牛羊僕往投爾地可速遣人至噶爾璽多爾濟處令彼出兵助汝噶爾璽多爾濟乃我同朝之人

汝其勿疑此外又傳語噶爾賈多爾濟曰哈密若有噶爾丹聲息報汝汝卽遣人來報一面往助哈密協力而行灘納泰都爾白兒濟各口撥人小心駐防哨探臣於十月十二日親至肅州同提督李林隆會商備綠旗兵二千在額濟內昆都倫等處仍坐哨探聽並令李林隆防守邊疆各自整備訖 上以示議政諸臣曰阿南達處處備兵朕甚爲之喜○甲辰先是昭莫多之捷有厄魯特曼濟受傷被擒至是曼濟以其妻子在噶爾丹所求歸 上命遣之至大將軍處偕阿旺丹津齎敕文諭噶爾丹丹濟拉等敕曰 皇帝敕諭噶爾丹丹濟拉等朕統御天下要以中外一體爲務往者烏闌布通之役爾等雖經敗北朕尙欲與爾等會約以定喀爾喀之事故使命屢頒爾等乃違棄誓言搶掠納木扎爾陀音竟至克魯倫地方朕親率師欲與爾會同定議遣使申諭爾復狐疑不信

不親見朕使及朕至克魯倫爾遂望風奔潰遇朕西路之兵爾先犯我顏行遂至喪兵敗衄盡棄駝馬牛羊子女廬帳什物爾眾寨桑台吉等接踵來降丹濟拉格壘沽英車陵奔等寨桑十五人亦願歸服遣察罕哈什哈來陳奏惻誠朕已面諭遣還今朕又親率六師遠莅於此且各處調兵邀截爾等妻子馬畜諸物俱已散亡衣食已盡勢迫無歸況時漸嚴寒朕不忍爾屬下厄魯特妻子相失窮困凍餓而死特遣諭招撫今重復降敕爾等若悔前愆俯首向化朕一體加恩撫恤俾各得所爾部下厄魯特亦得妻子完聚咸獲生全朕斷不念爾舊惡况爾部落人內有被我軍所俘其父母妻子尙在爾處不忍分離願歸故土者朕皆恩賚賜之坐騎糗糧卽令遣歸使其骨肉完聚其欲內附不願歸者朕皆富貴之各得生養爾部人曼濟重傷爲我軍所擒今曼濟言其妻子尙在爾

處因欲告歸朕是以給之恩賞賜以坐騎糗糧使齎敕遣回爾地
爾等思尙能自存有能收養爾等之人否其熟籌之今已無所歸
爾等可速領餘眾扞誠歸順朕必令爾等家富身榮各遂生養惜
此厄魯特如許生靈被爾驅迫至於此極今若又不覺悟聽信匪
言則後悔莫追矣爾其勿疑勿懼特諭○丙午諭內大臣等歸化
城當留一大臣受厄魯特降人完其夫婦給以衣食著散秩大臣

宗室永吉侍衛漢楚翰等隨駕至湖灘河朔仍回住歸化城○丁

未以郭洪爲甘肅巡撫

由布政使遷

○戊申右衛兵旣到 上親視賜

食命內大臣索額圖等傳諭曰戎行效力我朝之常朕欲勦滅噶
爾丹親統大軍進討噶爾丹望風逃竄遇爾西路之兵遂大敗之
爾等乏糧步行而能奮勇敗敵殊爲可嘉是以朕親臨賜食盡免
爾等所借官庫銀加恩於得傷病故之人眾官兵叩首謝恩歡聲

動地○己酉遣使齎敕招撫厄魯特丹津阿拉布坦丹津鄂木布
○庚戌 上駐蹕麗蘇奏 皇太后書曰十月二十七日頒示
慈旨齋到裘服外衣不勝歡欣但此閒河尙未凍帳房中不須置
火天無風雲時尙暖燠閒或一日思就清涼之處與 皇太后違
離遙遠意者念如前此之征行過爲縈慮也茲時此衣且不服俟
再加嚴寒卽歡忭而服之二十八日至黃河此卽鄂爾多斯部落
謹奏○是月免山西獲鹿等二十七州縣水災額賦有差

十一月甲寅朔厄魯特布達里來降奏稱噶爾丹見存千餘之兵
數日來食用困乏天時寒冽潰散逃亡及凍餓而死者甚多又火
藥軍器遺亡殆盡其寨桑諾爾布亦卽日率眾來降 上命遣布
達里赴京○己未 上自喀林拖會渡黃河駐蹕東斯垓時天氣
溫暖自喀林拖會東西數里外河水疾流獨我軍濟渡之處冰堅

盈尺 上命軍士等分三路墊土輜重渡河如履平地眾蒙古等

咸驚訝云從來黃河自北方寒處凍起如此溫暖河皆不凍獨在
中間結成厚冰不但未見亦所未聞也○庚申以能泰爲甘肅布

政使

由給事中遷

○甲子厄魯特諾爾布寨桑來降授以散秩大臣並

賜

御用冠服

○戊辰京師地震○以甘肅按察使囊吉里所

運翁金糧餉遲誤命革職○庚午撫遠大將軍伯費揚古奏王善

巴差長史伊伯根來報噶爾丹使所屬格壘沽英等二十人來請

納款已知會侍郎滿丕等令親身至厄魯特來人處或有奏章取

來驗視如無奏章問明速報

上命議政大臣等速檄大將軍伯

費揚古將格壘沽英本身及一僕人撥官一員星速乘驛押來本

朝所差厄魯特津巴等如與伊等同至則俱令前來其餘厄魯特

暫留枯卜地方如有奏章即著齎至格壘沽英寨桑等如未到伯

費揚古處著遣從別路而來毋使窺見營壘亦不得令見伯費揚古○副都統阿南達奏十一月初七日哨卒來報見有飛塵臣率兵往邀其來路因彼已過追至百有餘里於素爾河邊皆拘之係達賴喇嘛使人達爾漢鄂木布青海博碩克圖濟農使人阿爾達爾寨桑彭素克台吉使人寨桑和碩齊又問其所往言我等通問於噶爾丹今自噶爾丹所歸去見有噶爾丹使人與我等同歸查噶爾丹使人喇克巴彭楚克格隆等男婦子女五十餘人噶爾丹族姪顧孟多爾濟及男婦子女三十餘人又卓里克圖等男婦子女十餘人臣親率兵爲殿悉押至肅州交鴻臚寺綏黑圖遣達爾漢鄂木布前往外餘俱拘禁肅州候旨其噶爾丹屬託達賴喇嘛照看伊子塞卜騰巴爾珠爾書一併呈奏 上以示議政諸臣○癸酉噶爾齊多爾濟遣使請安 上諭尙書馬齊曰聞厄魯特之

噶爾賈多爾濟近日窘乏著於甘肅藩庫內支銀千兩賜之並給
來使銀兩○甲戌命撫遠大將軍伯費揚古減從乘驛星速前來
商議軍中機務將軍事著舒恕暫理○戊寅 上駐蹕東斯垓噶
爾丹使人格壘沽英至 上命領侍衛內大臣索額圖尙書馬齊
詢之格壘沽英曰我從前貿易來京歸時噶爾丹問 天朝兵勢
何如我言進口時見城池甚多各有兵鎮守人皆富足兵之強否
雖不得而知但我等在寓所時有 聖上親近侍衛名蘇達者來
買皮張年甚少而所執之弓甚勁我等俱不能開以我度之斷不
宜輕動噶爾丹從此疑我至丹濟拉乃我至親我既投降彼亦必
來歸順矣奏入 上召格壘沽英諭曰朕爲天下元后萬國一家
喀爾喀厄魯特向皆職貢本朝之國朕初無偏徇喀爾喀土謝圖
汗執喀爾喀扎薩克圖汗而殺之又殺爾主噶爾丹之弟其曲實

在喀爾喀喀爾喀爲爾國所敗前來歸朕憐彼十萬餘人身命失其生路受而養之凡有人窮迫來歸者朕皆收養無分彼此不但喀爾喀卽爾厄魯特今雖構兵有來降之人朕皆軫恤各使得生路量材授之官職雖被俘擄之人皆贖還其妻子完彼骨肉豈以喀爾喀厄魯特有異視乎前以噶爾丹無故闌入我境侵內地蒙古朕遣兵敗之於烏闌布通之地爾主噶爾丹窘極遁逃立誓不復犯邊朕向以至誠待人故不遣兵窮追爾主逆天背誓離其故巢竊伏克魯倫地方侵掠納木扎爾陀音朕不得已統兵出塞然仍再三遣使約噶爾丹會盟修好此朕不嗜殺人之心爾主不自引罪朕始整兵進討噶爾丹不能抗我軍威日夜奔逃適遇西路豫備之兵亦係噶爾丹先犯我軍故我師乃進戰大敗之汝今窮困至此極者皆爾等自取非朕欺陵之也爾旣奉使而來第公言

之毋隱格壘沽英叩首奏曰 皇上仁育無私孰不傾心悅服噶爾丹若迷而不悟不歸仁化徒自取滅亡而已○己卯諭議政大臣等天下當以仁感不可徒以威服今朕原無征噶爾丹之意皆噶爾丹所自取且噶爾丹兇暴朕惟待以寬仁噶爾丹奸狡朕惟示以誠信嘗覽經史云惟仁者無敵今噶爾丹窮迫已極遣格壘沽英前來乞憐朕意仍欲撫之諸臣奏曰此真天地好生之心實從古所未有也 上曰古之將帥雖善用兵多戮已降或其身不得善終或子孫不昌此皆好殺之明戒也又古之人主或窮兵黷武好大喜功朕意不然惟願宇宙雍熙四海昇平家給人足各得其生而已格壘沽英可仍遣回○遣噶爾丹使人格壘沽英還命員外郎博什希筆帖式閻壽齋敕偕往敕曰 皇帝敕諭噶爾丹丹濟拉等前者遣察哈代又遣曼濟敕諭爾等如引罪來降則朕

並無異視概爲矜恤務使得所爾屬下厄魯特亦得見其妻子朕斷不念爾等過惡當詳計之有能收養爾等之人否今已無所歸矣爾等率其所餘厄魯特作速來降朕必使爾等富貴各得其所今若仍不悔悟聽信匪人之言後悔難追毋疑毋懼亦已明白開諭汝等矣今爾噶爾丹丹濟拉又遣格壘沽英來奏曰蒙大沛恩綸不勝懼忭意必大加恩恤故遣格壘沽英覆奏朕以諸事詳諭格壘沽英遣之歸去前二次遣諭汝等敕內開載甚明但遵前旨速降之外更無別旨爲此特差員外博什希筆帖式閻壽齋敕前往特諭 上又諭格壘沽英曰爾還語噶爾丹丹令其親身來降否則朕必往討朕在此地行獵待爾限七十日內還報如過此期朕卽進兵矣正立限遣發之時包衣大達都虎奏曰 御用米糧將盡矣 上怒曰達都虎搖惑眾心可斬也如糧盡則取湖灘河朔

之米何慮之有糧雖盡朕必嚙雪窮追斷不同師宣諭後又將往幸邁達禮廟遣鄉導修路於時諸軍皆不喻既遣格壘沽英復使人隨之出二十里外上遂傳令班師眾皆大悅○辛巳以熊一瀟爲左副都御史由大理寺卿遷格爾特爲甘肅按察使由御史遷○壬午封厄魯特巴圖爾額爾克濟農爲多羅貝勒

十二月甲申撫遠大將軍伯費揚古來自軍中上命入行宮與語良久續召議政諸臣前諭曰朕謂噶爾丹乃熟於戰陣之狡寇滅之必需時日孰意一戰立至敗亡前者伯費揚古曾奏西路兵四月二十四日可至土喇二十七日可至巴顏烏闌故朕卽統軍前進後杳無聲息在察罕布拉克待之數日若果西路兵如期而至兩路夾攻則噶爾丹之兵一人亦不能脫矣其時諸臣尙欲待之於拖陵朕計西路兵將到土喇朕軍不可不前遂統軍疾進雖

噶爾丹懾我軍威潰遁而西路以疲困之眾遇敵戰勝勢如破竹實爲可嘉伯費揚古奏曰臣軍中機務皆謹遵 皇上指授手書密諭而行並未能別出意見有所效力況西路兵已糧匱馬乏不能前進及聞 駕至克魯倫官兵無不奮發齊言 皇上出自深宮尙且先至敵境我等敢不冒死前進故不俟督催奮勇克敵噶爾丹之破敗皆 聖謨神武之所致奈臣庸劣以 皇上窮追困蹙之寇不能生擒以獻實臣罪也 上顧伯費揚古曰噶爾丹被我軍擊敗後散者散降者降故朕復親臨塞外欲相機而行今觀陸續降人及格壘沽英之言噶爾丹窮蹙是實朕意不忍悉加屠戮不如撫而活之故於爾未至之前朕卽降旨招降伯費揚古奏曰 聖意迴出非常真天地好生之仁也○厄魯特車陵伊拉古克三胡土克圖遣使投誠命理藩院檄諭招撫之○乙酉 上駐

蹕湖灘河朔之南以御佩褭鍵弓矢等物賜大將軍伯費揚古
遣赴大軍○己丑諭戶部朕惟治天下之要惟以乂安民生爲急
顧欲安民生必除寇虐欲除寇虐必事師旅方今寰宇昇平人咸
樂業獨厄魯特噶爾丹狂逞邊塞荼毒生靈朕統軍出邊相機剿
撫茲回蹕雲中深軫民力之艱用沛特恩以示寬恤康熙三十六
年大同府屬州縣衛所應徵地丁銀米著全與蠲免俟噶爾丹殄
滅之後朕自誕布德音渙敷庥澤爾部卽行文該撫通行曉諭俾
咸悉朕惠愛黎元至意○辛卯諭大學士阿蘭泰山西巡撫溫保
丁憂員缺著將內閣學士倭倫升補溫保居官不善可傳諭倭倫
毋效伊所爲著卽赴任○哈密回子額貝都拉達爾漢白克遣使
奏若噶爾丹來臣等相機竭力擒之若聞聲息陸續奏聞上以
其誠心內附特賜蟒袍貂帽金帶等物○戊戌以蕭永藻爲廣東

巡撫由順天府尹遷

○已亥青海額爾德尼台吉納木扎爾奏請給黃

草灘地方捕獵遊牧 上以黃草灘已屬內地不准給○辛丑詔

五城粥廠展限兩月○壬寅 上還京師○以席爾登爲內閣學

士由翰林院侍讀學士遷

○癸卯諭領侍衛內大臣大學士等朕此次出師

察獲回回國王阿卜都里什特子孫及阿爾虎里白克等妻子今

卽速遣還之可馳諭川陝總督令回回國王阿卜都里什特暫止

還國俟伊等眷屬到時令其完聚偕往○庚戌諭戶部頃因有事

西陲不得已而煩民力甘肅所屬沿邊州縣衛所適當師行要道

供億繁多閭閻勞苦朕心深用軫念其明年地丁銀米悉予蠲免

○是月免江南上元等三縣水災額賦有差○是歲朝鮮來貢○

人丁戶口二千四十一萬三百八十二田地山蕩畦地五百九十

八萬六千四百五十四頃六十七畝有奇徵銀二千七百三十九

萬七千四百二十四兩有奇米豆麥六百九十六萬八千一百三十二石有奇草二百八萬一千六百一十二束茶十五萬七千四百五十三引行鹽四百三十一萬九千三百七十引徵課銀二百六十九萬五千二百八十二兩有奇鑄錢二萬三千七百六萬三千五十有奇